

Ilanngussaq E



INATSIARTUT

Aningaasaqarnermut Akileraartarnermullu Naalakkersuisoq

Ulloq: 9. november 2017

J.nr.: 01.31.11-000xx

Aningaasaqarnermut Akileraartarnermullu Ataatsimiititaliamit sisamangornermi ulloq 09. november 2017, nal. 16.00-17.00 ataatsimiittarfik Erling Høeghimi siunersiorneqarnissamut aggeqqusissut.

UKA 2017/95 pillugu Inatsisartut suleriaasianni § 19 naapertorlugu siunersiorneqarnissamut Aningaasaqarnermut Akileraartarnermullu Naalakkersuisoq Aningaasaqarnermut Akileraartarnermullu Ataatsimiititaliamit matumuuna aggersarneqarpoq.

Aningaasaqarnermut Ataatsimiititaliap oqaaseqaatai apeqqutaalu:

Immikkoortoq 95 pillugu ataatsimiititaliap 3. november apeqqutaanut Naalakkersuisut akissutaat ataatsimiititaliamit tiguneqarput.

Tassunga atatillugu aammalu ulloq 14. november pingajussaaneerinnilerneq eqqarsaatigalugu apeqqutit sisamat malitseqartitsissutaasut uku pillugit siunersiuinissaq ataatsimiititaliamit kissaatigineqarpoq:

- 1) Naatsorsuineq pillugu takussutissiami takuneqarsinnaavoq 50 mio. kr.-inik iluanaaruteqarnerunerup ilarujussua ingammik qalerallit (avataasiornermeersut) avammut tunineqarneranni akitsuutit annertuumik qaffanneranneersoq. Taanna 25 mio. kr.-init 55 mio. kr.-inut qaffariarpoq. Qaleralinniarnermut sunniutaanik aammalu inuussutissarsiortut 1) aalisarnermik ingerlatsiinnarsinnaanerminnut aammalu 2) aalisariutiminnut aningaasalersueqqinnissaminnut naammattumik sinneqartooruteqarnissaminnut periarfissaannik kiisalu siunnersuutip allatigut sunniutaanik Naalakkersuisut naliliinerat ataatsimiititaliamit tusarusunneqarpoq.
- 2) Aalisarnermut inatsimmik nutaamik akuersissutiginninnerup kingorna malitseqartitsinissaq pillugu apeqqummut Naalakkersuisut akipput ”nunatta karsiata isertitai qulakkeerniarlugit” malitseqartitsisoqartoq. Nunatta karsiata isertitai kisiisa Naalakkersuisut innersuussutigimmatigit ataatsimiititaliamit toqqissisimanartinneqanngilaq. Inatsimmik taama pingaaruteqartigisumik piareersaalluni sulinermi susasaqartut pisariaqarneratut annertussusilimmik akuutinneqarnissaat ataatsimiititaliamit pingaartinneqarpoq. Qanorluunniit pisoqaraluarpat inuussutissarsiortut isertitaqarsinnaassusiannut aalisarnermut inatsisip allanngortitsineranut sanilliullugu akitsuuseeriaatsip nutaap naleqqussarneqarnissaa pillugu inuussutissarsiortut malitseqartitsilluni oqaloqatiginissaat pingaartinneqartariaqarpoq. 1) akitsuuseeriaatsip allanngortinnerata, 2) akitsuutit annertussusiinik allanngunerup kiisalu 3) aalisarnermut inatsisip nutaap sunniutaasa kingunerisaannik siunnersuutip matuma

nakkutilliiviginissaanut naleqqussarnissaanullu Naalakkersuisut
inuussutissarsiortunik qanoq oqaloqatiginnillutik akuutitsilersaarnersut
itisilerneqassasoq ataatsimiititaliamit kissaatigineqarpoq.

- 3) Kalaallit Nunaanni aalisariutit pisoqalisimaqaat agguaqatigiissillugulu ukiunik 27-inik pisoqaassuseqarlutik. Taamaalillutillu akitsuutit maannatut qaffasissuseqartillugit nutartigassanngoreersimallutik. Akitsuutit 300 mio.-it missaannit 350 mio. kr.-it missaannut 50 mio. kr.-inik qaffannerat inuussutissarsiortunut umiarsuarnut nutaanut aningaasaliinissamut kajumissuseqarnerulersitsissasoq Naalakkersuisunit nalilerneqarpa? 50 mio. kr.-it konto pingaarnermi 24.13.50-imi, akileraartarnermi akitsuusiisarnermilu isertitaqarnerulernissamut sillimmatinut tunngasumi, sillimmatitut immikkoortinneqartut atugassiissutigineqarnissaannut aalisarnermut inatsit nutaaq qanoq sunniuteqartussatut Naalakkersunit naatsorsuutigineqarpa?

Inatsisissatut siunnersuummi oqartussat suliniaqatigiiffiit il. il. Tusarniaavigineqarnerat pillugu immikkoortumi, danskisuuani qupp. 18-imi, isumalluutunik atuineranut akitsuutip isertitanit akileraaruteqaataasussanit ilanngaatigineqarsinnaanera pillugu KNAPK-p apeqqutaanut akissuteqartoqartoq ataatsimiititaliamit oqaatigineqassaaq.

Kalaallisuuani taassuma akissutaa siullermeerinninnermi ersernerluttutut isigineqarpoq:
"Naalakkersuisut maluginiarpaat, aalisakkanut akitsuutit, aningaasartuutitulli allatut, isertitanik akileraarnikkut ilanngaataasinnaasassasut."

- 4) Taamaattumillu ersarissumik akissuteqartoqarnissaa pisariaqartoq ataatsimiititaliaq isumaqarpoq – ilanngaatigineqarsinnaatitaappat imaluunniit naamik?"

Suliap ingerlanneqarnerani pissutsit makku ataatsimiititaliamit naammagineqanngillat:

- a) Akitsuuseeriaatsimik annertuumik allannguinerup kingorna susassaqtunut pingasuinnarnut nukinginnartumik tusarniaasimaneq.
- b) Aappassaaneerinninnissamut akissuteqaammi tunngavilersuummi ima allassimavoq "Isertitaqarnerussutissat aningaasanut inatsisissatut siunnersuutip pingajussaaneerineqarnerani atortussanngortinneqarnissaa naatsorsuutigineqarpoq, tamannalu 2018-imut aningaasanut inatsisissatut siunnersuutip oqimaaqatigiissinnissaanut pingaarutilimmik toqqammaviussaaq." Aningaasat akilersinniarnissaannut suli inatsisitigut tunngavissaqanngitsut ilanngullugit naatsorsuutigineqarnerat tunngaviusumik isigalugu akisussaassuseqannginnertut ataatsimiititaliamit isigineqarpoq. Taamaaliornikkut isumalluutunik atuineranut akitsuut pillugu inatsisissatut siunnersuutip aningaasat piinnarlugit akuersissutigineqarnissaa aarleqqutigineqarsinnaavoq, tassa aalisarnermut inatsisissamut ataqatigiissinneqarani.


Naalakkersuisumik siunersiuinermini allanik aamma apeqquteqarnissani ataatsimiititaliap naatsorsuutigaa.

Ataatsimiititaliap Naalakkersuisumik siunersiuinerata Naalakkersuisup ataatsimiititaliallu akornanni pingaarnersiulluni tulleriiaarinerit anguniakkallu pillugit naalakkersuineranut

tungasumik oqaloqatigiinnertut sapinngisamik iluseqartinneqartarnissaa
Aningaasaqarnermut Ataatsimiititaliamit anguniarneqarpoq. Taamatut oqallinneq
ammassumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu
ataatsimiititaliap Naalakkersuisumik siunersiuineranut atatillugu pissarsisinneqarnissani
ataatsimiititaliap kissaatigaa. Allakkiap kingusinnerpaamik ataatsimiititaliap
Naalakkersuisumik siunersiuinerata kinguninngua uunga nassiunneqarnissaa
qinnutigineqarpoq: saam@ina.gl. Allakkiap ataatsimiititaliap Naalakkersuisumik
siunersiuineranut nassarneqarpat atorneqarpallu taassuma nuutinnera ataatsimiititaliap
Naalakkersuisumik siunersiuinerata aallartinnerani ataatsimiititaliap oqalutnaan
ataatsimiititaliallu allattaanut tunniuteqquneqarpoq.

Med venlig hilsen



Jens Immanuelson
Formand for Finans- og Skatteudvalget